

四庫全書

子部

欽定四庫全書

子部

太平廣記卷二百六十九至  
七十四

詳校官中書臣潘有為

侍讀臣孫球覆勘

總校官進士臣楊懋珩

校對官修撰臣吳錫齡

謄錄監生臣陳覲龍

欽定四庫全書

太平廣記卷二百六十九

酷暴三

胡元禮

誣劉如璿惡黨

宋昱韋儼

蕭穎士

李希烈

盧杞

襄樣節度

史牟

李紳

胡泚

韋公幹

趙思綰

安道進

胡元禮

唐胡元禮定城人也進士擢第累授洛陽尉則天朝右  
臺員外監察尋即真加朝請大夫丁憂免起復尋檢校  
秋官郎中累遷司刑少卿滑州刺史廣州都督性殘忍  
深刻不可以情祈時李日知任司刑丞每按獄務從寬  
元禮屢折之日知終不易嘗出一死囚元禮欲判殺之  
與日知往復至于再三元禮怒命府吏謂曰元禮不離  
刑曹此囚無活法日知命報曰日知不離刑曹此囚無

死法竟以兩狀申日知果直時人忌元禮之苛刻嘗于  
宣仁門外爲冤家羅辱于泥中幸金吾救助救榜仇者  
百臺中罰元禮五千以其辱臺也

出御史  
臺記

誣劉如璿惡黨

劉如璿事親以孝間解褐唐昌尉累遷乾封尉爲侍御  
史轉吏部員外則天朝自夏官郎中左授都城令轉南  
鄭令遷司僕司農少卿秋官侍郎時來俊臣黨人與司  
刑府史姓樊者不協誣以反誅之其子訟寃于朝堂無

敢理者乃援刀自剗其腹朝士莫不目而悚惕璿不覺唧唧而淚下俊臣奏云黨惡下詔獄璿訴曰年老因遇風而淚下俊臣劾之曰目下涓涓之淚乍可因風口稱唧唧之聲如何取雪處以絞刑則天特流于灤州子景憲訟寃得徵還復秋官侍郎辭疾授兗州都督好著述文集四十卷行於代俊臣但苛虐無文其劾乃鄭惜之

詞也

出御史臺記

宋昱韋儼

李林甫是姜皎外甥楊國忠是張易之外甥楊國忠爲  
劍南召募使遠赴瀘南糧少路險韋先回者其劍南行  
人每歲令宋昱韋儼爲御史迫促郡縣徵之人知必死  
郡縣無以應命乃設詭計詐令僧設齋或于要路轉變  
其衆中有單貧者即縛之置密室中授以絮衣連枷作  
隊急遁赴役

出譚  
賓錄

### 蕭穎士

蕭穎士性異常嚴酷昔有一僕事之十餘載穎士每一

錘楚百餘不堪其苦人或激之擇木其僕曰我非不能  
他從遲留者乃愛其才耳

出據言

李希烈

建中中李希烈攻汴州城未陷驅百姓婦女及輜重

以實壕塹謂之濕梢

出傳載

盧杞

殿中侍御史鄭詹與張鎰厚善每伺盧杞晝寢輒詣鎰  
杞知之他日杞假寐佯熟伺詹果來知與鎰偶語杞遽



至鑑閣中詹趨避杞遂言密事鑑曰殿中鄭侍御在此杞佯愕曰向者所言非他人所宜聞也後深劾詹之罪以排嚴郢三司使方按二人獄猶未具而杞已奏殺詹

黜郢中外側目

出談賓錄

### 襄樣節度

襄陽人善爲漆器天下取法謂之襄樣及于司空爲帥多暴鄭元鎮河中亦暴遠近呼爲襄樣節度

出國史補

### 史年

史牟權鹽於解縣初變權法以中朝廷有外甥十餘歲從牟檢畦拾鹽一顆以歸牟知立杖殺之其姊哭而出救已不及矣

出國史補

李紳

李紳以舊宰相鎮一方恣威權凡戮有罪猶待秋分永寧吳尉弟湘無辜盛夏被殺崔元藻銜德裕片已即翻其辭因言御史覆獄還皆對天子別白是非權軋天子使不得對詔獄不付有司但用紳奏而真相死是時德

裕已失權李宗閔故黨令狐綯崔鉉白敏中皆當路因是逞憾以利誘動元藻等使三司結紳杖鉞作藩虐殺良平準神龍詔書酷吏死者官爵皆奪子孫不得進宦紳雖亡請從春秋戮死者之詔削紳三官子孫不得仕貶德裕等擢汝納左拾遺元藻武功令始紳以文藝節操見用然所至務爲威烈或陷暴刻故卒坐湘寃云

闕

### 胡湔

潘之南七十里至辦州爲陵水郡辦之守曰胡湔故淮

西吳少誠之卒鴟張荒陬多法河朔叛將所爲且好蹴鞠南方馬痺小不善馳騁淞每召將吏鞠且患馬之不習便更命夷民十餘輦肩輿淞輦揮杖肩者且走且擊旋環如風稍怠淞即以策叩其背亟紀力反鞭亟走用爲

笑樂嘻淞一叛卒耳彼雖夷獠天子之民也天意豈使可封者受毒痛於可誅者乎淞之不道彈人剗孕斯近之矣豈命吏者以遠人爲藹狗耶何其用斯人也毒虐一方之民哉後一歲淞以罪聞詔流於九真自辦五十

里至羅州爲招義郡郡旁海海有煮海場三然郡民盜煮亦不能禁郡多密潔白如雪

出投荒  
雜錄

### 韋公幹

崖州東南四十里至瓊山郡太守統兵五百人兼儋崖振萬安五郡招討使凡五郡租賦一供於招討使四郡之隸於瓊瓊隸廣海中五州歲賦廉使不得有一緡悉以給瓊軍用軍食仍仰給於北海諸郡每廣州易帥仍賜錢五十萬以犒飫瓊守雖海渚歲得金錢南邊經略

使不能及郡守韋公幹者貪而且酷掠良家子為臧獲如驅犬豕有女奴四百人執業者大半有織花縑文紗者有伸角為器者有鎔鍛金銀者有攻珍木為什具者其家如市日考月課唯恐不程公幹前為愛州刺史境有馬援銅柱公幹摧鎔貨與賈胡土人不知伏波所鑄且謂神物哭曰使君果壞是吾屬為海神所殺矣公幹不聽百姓奔訴於都護韓約約遺書責辱之乃止既收瓊多烏文喏咤皆奇木也公幹驅木工沿海採伐至有

不中程以斤自刃者前一歲公幹以韓約壻受代命二  
大舟一實烏文器雜以銀一實哇施器雜以金浮海東  
去且令健卒護行將抵廣木既堅密金且重未數百里  
二舟俱覆不知幾萬萬也書曰貨悖而入亦悖而出公幹  
不道殘人以得貨竭夷獠之膏血以自厚徒穢其名曾  
不得少有其利陰禍陰匿苟脫人誅將鬼得誅也

出投  
荒雜

錄

趙思綰

賊臣趙思綰自倡亂至敗凡食人肝六十六無非面剖而膾之至食欲盡猶宛轉叫呼而戮者人亦一二萬嗟乎倘非名帥仗皇威而勦之則孰能剪滅黔黎之猘獠

出玉堂  
閒話

### 安道進

有安道進者即故雲州帥重霸李弟河東人也性凶險莊宗潛龍時爲小校常佩劍列於翊衛忽一日拔而玩之謂人曰此劍也可以刺鍾切玉孰敢當吾鋒鋌旁有



一人曰此又是何利器妄此誇譚假使吾引頸承之安能快斷乎道進曰真能引頸乎此人以爲戲言乃引頸而前遂一揮而斷旁人皆驚散道進攜劍日夜南馳投于梁主梁主壯之俾隸淮之鎮戍有掌庾吏進謂曰古人謂洞其七札爲能吾之鈇鏃可徹其十札矣爾輩安知之吏輕之曰使我開襟俟之能徹吾腹乎安曰試敢開襟否吏即開其襟道進一發而殪之利鏃逕過植于墻上安蓄一犬一婢遂挈而南奔晝則從于蘆荻中夜

則望星斗而竄又時看眼中神光光多處爲利方光少處爲不利既能服氣遂絕粒經時抵江湖間左挈婢右攜犬而輒浮渡殊無所損淮帥得之擢爲裨將賜與甚豐時兄重霸事蜀亦爲列校間弟在吳乃告王蜀主王嘉其意發一介以請之迨至蜀亦爲主將後領兵戍于天水營長道縣重霸爲招討馬步使駐于秦亭縣民有愛子託之于安命之曰廳子道進適徃戶外廳子偶經行於寢之前安疑之大怒遂腰斬而投于井其家號訴

於霸傳送招討使王公至于南梁王公不忍加害表救  
活之反憾其元昆又欲害其家族兄家開小戶防之蜀  
破道進東歸明宗補爲諸州馬步軍都指揮使後有過

鞭背卒

出玉堂  
閒話

太平廣記卷二百六十九

欽定四庫全書

太平廣記卷二百七十

婦人一

洗氏

衛敬瑜妻

周迪妻

鄒待徵妻

奉天竇氏二女

鄭神佐女

盧夫人

符鳳妻

呂榮

封景文

高彥昭女

李誕女

義成妻

魏知古妻

侯四娘

鄭路女

鄒僕妻

竇烈女

歌者婦

洗氏

洗氏高涼人世爲南越首領部落十餘萬幼賢明在父母  
家能撫循部衆壓服諸越高涼太守馮寶聞其志行聘爲妻  
每與夫寶參決詞訟政令有序侯景反都督蕭勃徵兵入援  
遣刺史李遷召寶寶欲往氏疑其反止之後果反寶卒嶺表  
大亂氏懷集之百越晏然子僕尚幼以氏功封信都侯詔冊

氏為中郎將石龍太夫人賚繡幃油絡馬安車鼓吹麾幢  
旌節如刺史之儀僕卒百越號夫人為聖母王仲宣反夫人  
帥師敗之親披甲乘馬巡撫諸州嶺南悉定封譙國夫人幕  
府署長史官屬給印章使宣行事皇后賜以首飾及宴服  
一襲時番州總管趙訥貪虐黎獠多亡叛夫人上封事論  
之敕夫人招慰夫人親載詔書自稱使者歷十餘州宣述德  
意所過皆降文帝賜夫人臨振縣湯沐邑卒諡誠敬

闕

衛敬瑜妻

衛敬瑜妻年十六而夫亡父母舅姑欲嫁之乃截耳爲誓不許戶有巢燕常雙飛後忽孤飛女感其偏栖乃以縷繫脚爲誌後歲此燕果復來猶帶前縷妻爲詩曰昔年無偶去今春又獨歸故人恩義重不忍更雙飛

闕

周迪妻

周迪妻某氏迪善賈往來廣陵會畢師鐸亂人相略賣以食迪飢將絕妻曰今欲歸不兩全君親在不可并死願見賣以濟君行迪不忍妻固與詣肆售得數千錢以



奉迪至城門守者誰何疑其給與迪至肆問狀見妻首  
已在于柶矣迪裹餘體歸葬之

開

### 鄒待徵妻

鄒待徵妻薄者武康尉自牧之女也從待徵官江陰袁  
晁亂待徵解印竄匿薄爲賊所掠將汙之不從語家媼  
使報待徵曰我義不辱即死于水賊去得其尸義聲動  
江南聞人李華作哀節婦賦曰昔歲隋盜並起橫行海  
浙江陰萬戶化爲凝血無石不焚無玉不折峩峩薄媛

炯然名節自牧之子鄒徵之妻王德蘭姿女之英兮鄒也避禍伏于榛莽婉如之賓執爲囚虜匍匐泥沙極望無睹出授官之告託垂白之姥姥感夫人爰達鄒君兵解求尸在于江濱哀風起爲連波痛氣結爲孤雲鳬雁爲之哀鳴日月爲之蒙昏端標移景而恒直勁芳貫霜而猶存知子莫如父誠哉長者之言

闕

奉天竇氏二女

奉天縣竇氏二女伯娘仲娘雖長於村野而幼有志操

住與邠州接界永泰中草賊數千人持兵刃入其村落  
行剽劫聞二女有容色姊年十九妹年十六藏於巖窟  
間賊徒擬爲逼辱乃先曳伯娘出行數十步又曳仲娘  
出賊相顧自慰行臨深谷伯娘曰我豈受賊汙辱乃投  
之於谷賊方驚駭仲娘又投於谷谷深數百尺姊尋卒  
仲娘脚折面破血流被體氣絕良久而蘇賊義之而去  
京兆尹第五琦感其貞烈奏之詔旌表門閭長免丁役  
二女塋事官給京兆尹曹陸海首賦以美之

鄭神佐女

大中五年兗州瑕丘縣人鄭神佐女年二十四先許適  
馳雄牙官李元慶神佐亦爲官健戍慶州時党項叛神  
佐戰死其母先亡無子女以父戰歿邊城無由得還乃  
剪髮壞形自往慶州護父喪還至瑕丘縣進賢鄉馬青  
村與母合塋便廬於墳所手植松檜誓不適人節度使  
蕭俶以狀奏之曰伏以閭里之中罕知禮教女子之性  
尤昧義方鄭氏女痛結窮泉哀深陟岵投身沙磧歸父

遺骸遠自邊陲得還閭里感蓼莪以積恨守丘墓以誓  
心克彰孝理之仁足勵貞方之節詔旌表門閭而贊曰  
政教隆平男忠女貞禮以自防義不苟生彤管有煒蘭  
閨振聲闕雎合雅始號文明

闕

盧夫人

盧夫人房玄齡妻也玄齡微時病且死囑曰吾病革君  
年少不可寡居善事後人盧泣入帷中剔一目示玄齡  
明無他意玄齡良愈禮之終身 按妬婦記亦有夫人

何賢於微時而妬於榮顯邪予於是而有感

闕

符鳳妻

王英唐時符鳳妻也尤姝美鳳以罪徙儋州至南海爲  
獠賊所殺脅王英私之對曰一婦人不足以事衆男子  
請推一長者賊然之乃請更衣有頃盛服立於舟上罵  
曰受賊辱不如死遂自沉於海

闕

呂榮

許升妻呂氏字榮升少爲博徒不理操行榮嘗躬勤家

業以奉養其姑數勸升修學每有不善輒流涕進規榮父積忿疾升乃呼榮欲改嫁之榮嘆曰命之所遭義無離貳終不肯歸升感激自勵乃尋師遠學遂以成名尋被本州辟命行至壽春爲盜所殺刺史尹耀捕盜得之榮迎喪於路間而詣州請甘心讐人耀聽之榮乃手斷其頭以祭升靈後郡遭寇賊賊欲犯之榮踰垣走賊拔刀追之賊曰從我則生不從我則死榮曰義不以身受辱寇虜遂殺之是日疾風暴雨雷電晦冥賊惶懼叩頭

謝罪乃殯葬之

闕

封景文

殷保晦妻封敖孫也名絢字景文能文章草隸保晦歷  
校書郎黃巢入長安共匿蘭陵里明日保晦逃賊悅封  
色欲取之固拒賊誘悅萬詞不答賊怒勃然曰從則生  
不然正膏我劍封罵曰我公卿子守正而死猶生也終  
不從逆賊手遂遇害保晦歸左右曰夫人死矣保晦號  
而絕

闕



高彥昭女

高愍女名妹妹父彥昭事正已及納拒命質其妻子使守濮陽建中二年挈城歸河南都統劉元佐屠其家時女七歲母李憐其幼請免死爲婢許之女不肯曰母兄皆不免何賴而生母兄將被刑徧拜四方女問故答曰神可祈也女曰我家以忠義誅神尚何知而拜之問父所在西嚮哭再拜就死德宗駭歎詔太常謚曰愍諸儒爭爲之誄彥昭從元佐救寧陵復汴州授潁州刺史朝

廷錄其忠居州二十年不徙卒贈陝州都督

開

李誕女

東越閩中有庸嶺高數十里其下北隰中有大蛇長七八丈圍一丈土俗常懼東治都尉及屬城長吏多有死者祭以牛羊故不得福或與人夢或喻巫祝欲得噉童女年十二三者都尉令長患之共求人家生婢子兼有罪家女養之至八月朝祭送蛇穴口蛇輒夜出吞噉之累年如此前後已用九女一歲將祀之募索未得將樂

縣李誕家有六女無男其小女名寄應募欲行父母不聽寄曰父母無相留今惟生六女無有一男雖有如無女無緹縈濟父母之功既不能供養徒費衣食生無所益不如早死賣寄之身可得少錢以供父母豈不善耶父母慈憐不聽去終不可禁止寄乃行請好劍及咋蛇犬至八月朝便詣廟中坐懷劍將犬先作數石米糝蜜麩以置穴口蛇夜便出大如困目如二尺鏡聞糝香氣先噉食之寄便放犬犬就噉咋寄從後斫蛇因踊出至

庭而死寄入視穴得其九女髑髏悉舉出咤言曰汝曹怯弱爲蛇所食甚可哀愍於是寄女緩步而歸越王聞之聘寄爲后拜其父爲將樂令母及姊皆有賜賞自是東治無復妖邪之法其歌謠至今存焉

出法苑珠林

義成妻

漢源縣人義成妻壯年無子夫死將葬及先殯時含毒藥酒至未入墓時撫棺吞之而死乃爲合葬焉時以狀聞有詔賜帛事見常璠國志

出黎州國經

魏知古妻

唐工部尚書魏知古性雅正善屬文年七十卒於位妻蘇氏不哭比至香水洗浴含襲訖舉聲一慟而絕與尚書同日合喪時奇其節以爲前代未之有

闕

侯四娘

至德元年史思明未平衛州有婦人侯四娘等三人刺

血謁於軍前願入義營討賊

出獨異志

鄭路女

鄭路昆仲有爲江外官者維舟江渚羣偷奄至即以所有金帛羅列岸上而恣賊運取賊一不犯曰但得侍御小娘子足矣其女則羞色賊潛知之矣骨肉相顧不知所以答女欣然請行其賊即具小舟載之而去謂賊曰君雖爲偷得無所居與親屬焉然吾家衣冠族也既爲汝妻豈以無禮見逼若達所止一會親族以託好仇足矣賊曰諾又指所偕來二婢曰公既以偷爲名此婢不當有爲公計不若歸吾家賊以貌美其言且順顧已無

不可者即自鼓其棹載二婢而去女於是赴江而死

出玉

子泉

### 鄒僕妻

梁末龍德壬午歲襄州都軍務鄒景溫移職于徐亦綰

都軍之務有勁僕

失其姓名

自恃拳勇獨與妻策驢以路至

宋州東芒碭澤素多賊盜行旅或孤則鮮有獲免者其

日與妻偕憩于陂之半雙柳樹下大咤曰聞此素多豪

客豈無一人與吾曹決勝負乎言粗畢有五六盜自叢

薄間躍出一夫自後雙手交抱搏而仆之其徒遽扼其  
喉抽短刃以斷之斯僕隨身兵力略無所施蓋掩其不  
備也唯妻在側殊無惶駭但矯而大呼曰快哉今日方  
雪吾之恥也吾比良家之子遭其俘掠以致於此孰謂  
無神明也賊謂誠至而不殺與行李并二驢驅以南邁  
近五六十里至毫之北界達孤莊南而息焉莊之門有  
器甲蓋近戍巡警之卒也其婦遂徑入村人之中堂盜  
亦謂其謀食不疑也乃泣拜其總首且告其夫適遭屠



戮之狀總首聞之潛召其徒俱時執縛唯一盜得逸械送毫城咸棄於市其婦則返襄陽還削爲尼誓終焉之

志

出玉堂  
閑話

竇烈女

烈女姓竇氏小字桂娘父良建中初爲汴州戶曹掾桂娘美顏色讀書甚有文李希烈破汴州使甲士至良門取桂娘去將出門顧其父曰慎無戚戚必能滅賊使大人取富貴于天子桂娘既以才色在希烈側復能巧曲

取信凡希烈之密雖妻子不知者悉皆得聞希烈歸蔡州桂娘嘗謂希烈曰忠而勇一軍莫如陳仙奇其妻竇氏仙奇寵且信之願得相往來以姊妹叙齒因徐說之以堅仙奇之心希烈然之因以姊事仙奇妻嘗間謂曰賊凶殘不道遲晚必敗姊應早圖遺種之地仙奇妻然之興元元年四月希烈暴死其子不發喪欲盡誅老將校俾少者代之計未決有獻含桃者桂娘白希烈子請分遺仙奇妻且以示無事於外因爲蠟帛書曰前日已

死殯在後堂欲誅大臣須自爲計次朱染帛丸如含桃  
仙竒發丸見之言於薛育曰兩日稱疾但怪樂曲雜發  
盡夜不絕此乃有謀未定示暇於外事不疑矣明日仙  
竒薛育各以所部兵謀於衙門請見希烈烈子迫出拜  
願去僞號一如李納仙竒曰爾悖逆天子有命因斬希  
烈妻及子函七首以獻陳尸於市後兩月吳少誠殺仙  
竒知桂娘謀因亦殺之

出樊  
川集

歌者婦

南中有大帥世襲爵位然頗恣橫有善歌者與其夫自  
北而至頗有容色帥聞而召之每入輒與其夫偕至更  
唱迭和曲有餘態帥欲私之婦拒而不許帥密遣人害  
其夫而置婦于別室多其珠翠以悅其意逾年往詣之  
婦亦欣然接待情甚婉孌及就榻婦忽出白刃於袖中  
擒帥而欲刺之帥掣肘而逸婦逐之適有二奴居前闔  
其扉由是獲免旋遣人執之自斷其頸矣

出玉堂閒話

太平廣記卷二百七十

欽定四庫全書

太平廣記卷二百七十一

婦人二

賢婦

徐才人

盧氏

董氏

高叡妻

崔敬女

李畬母

盧獻女

鄧廉妻

肅宗朝公主

潘炎妻

劉皇后

河池婦人

賀氏

才婦

謝道韞

楊容華

上官昭容

張氏

杜羔妻

張睽妻

關圖妹

魚玄機

牛肅女

慎氏

薛媛

孫氏

賢婦

徐才人

徐氏名惠堅之女也生五月能言唐太宗以爲才人特遷爲充容軍旅未寧上疏諫修宮室詞甚典美上然之

盧氏

狄仁傑之爲相也有盧氏堂姨居于午橋南別墅姨止有一子而未嘗來都城親戚家仁傑每伏臘晦朔修禮甚謹常經雪後休暇仁傑因候盧姨安否適表弟挾弓矢攜雉兔而來歸進膳於母顧揖仁傑意甚輕簡仁傑因啓於姨曰某今爲相表弟有何樂從願悉力從其旨姨曰相自貴

爾姨止有一子不欲令其事女主仁傑大慙而退

出松憲  
雜錄

董氏

則天朝太僕卿來俊臣之彊盛朝官側目上林令侯敏偏事之其妻董氏諫止之曰俊臣國賊也勢不久一朝事壞奸黨先遭君可敬而遠之敏稍稍而退俊臣怒出爲涪州武隆令敏欲棄官歸董氏曰速去莫求住遂行至州投刺參州將錯題一張紙州將展看尾後有字大怒曰修名不了何以爲縣令不放上敏憂悶無已董氏曰但住莫求去



停五十日忠州賊破武隆殺舊縣令略家口並盡敏以不  
許上獲全後俊臣誅逐其黨流嶺南敏又獲免

出朝野  
僉載

### 高叡妻

趙州刺史高叡妻秦氏默啜賊破定州部至趙州長史  
已下開門納賊叡計無所出與秦氏仰藥而詐死昇至  
啜所良久啜以金獅子帶紫袍示之曰降我與爾官不  
降即死叡視而無言陽顧其婦秦氏秦氏曰受國恩報  
在此今日受賊一品何足爲榮俱合眼不語經兩日賊

知不可屈乃殺之

出朝野僉載

崔敬女

唐冀州長史吉懋欲爲男項娶南宮縣丞崔敬女敬不許因有故脅以求親敬懼而許之擇日下函并花車卒至門首敬妻鄭氏初不知抱女大哭曰我家門戶低不曾有吉郎女堅卧不起其小女白其母曰父有急難殺身救解設令爲婢尚不合辭姓望之門何足爲恥姊若不可見自當之遂登車而去項遷平章事賢妻達節談者榮之項

坐與河內王武懿宗爭競出爲溫州司馬而卒

出朝野僉載

### 李畬母

監察御史李畬母清素貞潔畬請祿米送至宅母遣量之膳三石問其故令史曰御史例不槩又問腳錢幾又曰御史例不還腳車錢母怒令送所膳米及腳錢以責畬畬乃追倉官科罪諸御史皆有慙色

出朝野僉載

### 盧獻女

文昌左丞盧獻第二女先適鄭氏其夫早亡誓不再醮

姿容端秀顏調甚高姊夫羽林將軍李思冲姊亡之後  
奏請續親許之兄弟並不敢白思冲擇日備禮贄幣甚  
盛執致就宅盧氏拒闕抗聲詈曰老奴我非汝匹也乃  
踰垣至所親家截髮冲奏之敕不奪其志後爲尼甚精  
進出朝野  
僉載

鄧廉妻

滄州弓高鄧廉妻李氏女嫁未周年而廉卒李年十八  
守志設靈几每日三上食臨哭布衣蔬食六七年忽夜

夢一男子容止甚都欲求李氏爲偶李氏睡中不許之  
自後每夜夢見李氏竟不受以爲精魅書符呪禁終莫  
能絕李氏歎曰吾誓不移節而爲此所撓蓋吾容貌未  
衰故也乃援刀截髮麻衣不濯蓬鬢不理垢面灰身其  
鬼又謝李氏曰夫人竹柏之操不可奪也自是不復夢  
見郡守旌其門閭至今尚有節婦里

出朝野  
僉載

### 肅宗朝公主

肅宗讌于宮中女優弄假戲有綠衣秉簡爲參軍者天

寶末蕃將阿布恩伏法其妻配掖庭善爲優因隸樂工  
是以遂令爲參軍之戲公主諫曰禁中妓女不少何必  
須得此人使阿布恩真逆人耶其妻亦同刑人不合近  
至尊之座若果冤橫又豈忍使其妻與羣優雜處爲笑  
謔之具哉妾雖至愚深以爲不可上亦憫惻遂罷戲而  
免阿布恩之妻由是賢重公主

公主即柳晟之母也出因話錄

潘炎妻

潘炎侍郎德宗時爲翰林學士恩渥極異其妻劉晏女

也京尹某有故伺候累日不得見乃遺閤者三百縑夫人知之謂潘曰豈爲人臣而京尹願一謁見遺奴三百縑其危可知也遽勸潘公避位子孟陽初爲戶部侍郎夫人憂惕謂曰以爾人材而在丞郎之位吾懼禍之必至也戶部解喻再三乃曰不然試會爾同列吾觀之因遍招深熟者客至夫人垂簾視之既罷會喜曰皆爾儔也不足憂矣問末座慘綠少年何人也曰補闕杜黃裳夫人曰此人全別必是有名卿相出幽間鼓吹

### 劉皇后

後唐太祖至州上源驛之變太祖憤恨欲迴軍攻之劉  
皇后時隨軍行謂太祖曰公爲國討賊而以杯酒私忿  
若攻城即曲在於我不如迴師自有朝廷可以論列於  
是班師天復中周德威爲汴軍所敗三軍潰散汴軍乘  
我太祖危懼與德威議出保雲州劉皇后曰妾聞王欲  
棄城而入外藩誰爲此畫曰存信輩所言劉后曰存信  
本北蕃牧羊兒也焉顧成敗王常笑王行瑜棄權失勢



被人屠割今復欲效之也王頃歲避難達鞏幾遭陷害  
賴遇朝廷多事方得復歸今一旦出城便有不測之變  
焉能遠及北蕃遂止居數日亡散之士復集軍城安堵

劉后之力也

出北夢  
瑣言

### 河池婦人

梁祖攻圍岐隴之年引兵至于鳳翔秦帥李茂貞遣我  
校李繼朗統衆救之至則大捷生降七千餘人及旋軍  
於河池縣掠獲一少婦甚有顏色繼朗悅之寢處於兵

幕之下西邁十五餘程每欲逼之即云我姑嚴夫妬請以死代之戎帥怒脅之以威終莫能屈帥笑而憫之竟不能犯使人送還其家

出玉堂閒話

### 賀氏

兗州有民家婦姓賀氏里人謂之織女父母以農爲業其丈夫則負擔販賣往來于郡賀初爲婦未浹旬其夫出外每出數年方至至則數日復出其所獲利蓄別婦於他所不以一錢濟家賀知之每夫還欣然奉事未嘗

形於顏色夫慙愧不自得更非理毆罵之婦亦不之酬  
對其姑已老且病凍餒切骨婦傭織以資之所得傭直  
盡歸其姑已則寒餒姑又不慈日有凌虐婦益加恭敬  
下氣怡聲以悅其意終無怨歎夫嘗挈所愛至家賀以  
女弟呼之略無慍色賀爲婦二十餘年其夫無半年在  
家而能勤力奉養始終無怨可謂賢孝矣

出玉堂  
閒話

才婦

謝道韞

王凝之妻謝道韞王獻之與客談義不勝道韞遣婢白曰請  
與小郎解圍乃施青綾步障自蔽與客談客不能屈

出獨異志

### 楊容華

楊臨川姪女曰容華幼善屬文嘗為新妝詩好事者多傳  
之詩曰宿鳥驚眠罷房櫳垂曉開鳳釵金作縷鸞鏡玉為  
臺粧似臨池出人疑月下來自憐終不見欲去復徘徊

### 上官昭容

唐上官昭容之方娠母鄭氏夢神人界之大秤以此可

稱量天下生彌月鄭弄之曰爾非秤量天下孩啞應之  
曰是襁中遇家禍入掖庭年十四聰達敏識才華無比  
天后聞而試之援筆立成皆如宿構自通天後逮景龍  
前恒掌宸翰其軍國謀猷殺生大柄多其所決至若幽  
求英雋鬱興詞藻國有好文之士朝希不學之臣二十  
年間野無遺逸此其力也而晚年頗外通朋黨輕弄權  
勢朝廷畏之矣玄宗平難被誅

出景龍  
文館記

張氏

燕文貞公張說其女嫁盧氏嘗為舅求官候父朝下而問焉父不語但指搢牀龜而示之女拜而歸室告其夫曰舅得詹事矣

出傳載

杜羔妻

杜羔妻劉氏善為詩羔累舉不中第乃歸將至家妻即先寄詩與之曰良人的的有奇才何事年年被放回如今妾面羞君面君到來時近夜來羔見詩即時迴去竟

登第

出王泉子

張睽妻

會昌中邊將張睽防戍十有餘年其妻侯氏繡迴文作  
龜形詩詣闕進上詩曰睽離已是十秋彊對鏡那堪重  
理粧聞雁幾迴修尺素見霜先為製衣裳開箱疊練先  
垂淚拂杵調砧更斷腸繡作龜形獻天子願教征客早  
還鄉敕賜絹三百疋以彰才美

出杼  
情詩

關圖妹

關圖有一妹甚聰惠文學書札罔不動人圖常語同僚

曰某家有一進士所恨不櫛耳後寓居江陵有醴賈常  
某者囊畜千金三峽人也亦家于江陵深結託圖圖亦  
以長者待之數載常公殂有一子狀貌頗有儒雅之風  
紀而略曉文墨圖竟以其妹妻之則常修也關氏乃與  
修讀書習二十餘年才學優博越絕流輩咸通六年登  
科座主司空李公蔚也初江東羅隱下第東歸有詩別  
修云六載辛勤九陌中却尋岐路五湖東名慙桂苑一  
枝綠鱸憶松江滿棹紅浮世到頭須適性男兒何必盡



成功惟應鮑叔深知我他日蒲帆百尺風又廣陵秋夜  
讀修所賦三篇復吟寄修云入蜀還吳三首詩藏於篋  
笥重於師劍闕夜讀相如聽瓜步秋吟煬帝悲物景也  
知翰健筆時情誰不許高枝明年二月東風裏江島間  
人慰所思修名望若此關氏亦有助焉後修卒關氏自  
為文祭之時人競相傳寫

出南楚  
新聞

### 魚玄機

女道士魚玄機字惠蘭甚有才思咸通中適李億補闕

後愛哀下山隸咸宜觀為道士詩曰易求無價寶難得  
有心郎又云蕙蘭銷歇歸春圃楊柳東西絆客舟自是  
縱懷乃倡婦也竟以殺侍婢為京尹溫璋殺之有集行  
於世

出北夢  
瑣言

### 牛肅女

牛肅長女曰應貞適弘農楊唐源少而聰穎經耳必誦  
年十三凡誦佛經二百餘卷儒書子史又數百餘卷親  
族驚異之初應貞未讀左傳方擬授之而夜初眠中忽

誦春秋起惠公元妃孟子卒終智伯貪而悞故韓魏反而喪之凡三十卷一字無遺天曉而畢當誦時若有教之者或相酬和其父驚駭數呼之都不答誦已而覺問何故亦不知試令開卷則已精熟矣問不答著文章百餘首後遂學窮三教博涉多能每夜中眠熟與文人談論文皆古之知名者往來答難或稱王弼鄭玄王衍陸機辯論鋒起或論文章談名理往往數夜不已年二十四而卒今採其文題題問影賦著於篇其序曰庚辰歲

予嬰沈痛之疾不起者十旬毀頤精神羸悴形體藥物  
救療有加無瘳感莊子有魍魎責影之義故假之爲賦  
庶解疾焉魍魎問於予影曰君英達之人聰明之子學  
包六藝文兼百氏躋道家之秘言探釋部之幽旨既虔  
恭於中饋又希慕於前史不矯枉以干名不毀物而成  
已伊淑德之如此即精神之足恃何故羸厥姿貌沮其  
精神煩寃枕席憔悴衣巾子惟形兮是寄形與子兮相  
親何不誨之以崇德而教之以自脩異萊妻之樂道殊

鴻婦之安貧豈痼疾而無生賴將微賤而欲忘身今節  
變歲移臘終春首照晴光於郊甸動暄氣於梅柳水解  
凍而繞軒風扇和而入牖固可解憂釋疾怡神養壽何  
默爾無營自貽伊咎僕於是勃然而應曰子居於無人  
之域遊乎魑魅之鄉形既圖於夏鼎名又著於蒙莊何  
所見之不博何所談之不老夫影依日而生像因人而  
見豈言談之足曉何節物之能辨隨晦明以興滅逐形  
骸以遷變以愚夫畏影而蒙鄙之性以彰智者視陰而

遲暮之心可見伊美惡兮由已影何辜而遇譴且予聞  
至道之精窈兮冥至道之極昏兮默達人委性命之修  
短君子任時運之通塞悔吝不能纏榮耀不能惑喪之  
不以爲喪得之不以爲得君子何乃怒予之不賞芳春  
責予之不貴華飾且吾之秉操奚子智之能測言未卒  
颺颺惕然而驚歎而起曰僕生絕域之外長於荒遐之  
境未曉智者之處身是以造君而問影既談玄之至妙  
請終身以藏屏初應貞夢製書而食之每夢食數十卷

則文體一變如是非一遂工爲賦頌文名曰遺芳

出記聞

### 慎氏

慎氏北陵虔亭儒家之女也三史嚴灌夫因游覽遂結  
姻好同載歸蘄春經十餘年無嗣息灌夫乃拾其過而  
出妻令歸二浙慎氏慨然登舟親戚臨流相送妻乃爲  
詩以訣灌夫灌夫覽之悽感遂爲夫婦如初慎氏詩曰  
當時心事已相關雨散雲飛一餉間便是孤帆從此去  
不堪重上望夫山

出雲谿  
友議

薛媛

濠梁人南楚材者旅遊陳潁歲久潁守慕其儀範將欲以子妻之楚材家有妻以受知於潁收忽不思義而輒已諾之遂遣家僕歸取琴書似無返舊之心或謂求道青城訪僧衡嶽不復留心於名宦也其妻薛媛善書畫妙屬文亦微知其意乃對鏡畫其形并詩四韻以寄之楚材得妻真及詩甚慙遽有雋不疑之讓夫婦遂偕老焉里語曰當時婦棄夫今日夫棄婦若不逞丹青空房



應獨自薛媛寫真寄夫詩曰欲下丹青筆先拈寶鏡端  
已經顏索寞漸覺鬢凋殘淚眼描將易愁腸寫出難恐  
君渾忘却時展畫圖看

出雲谿  
友議

### 孫氏

樂昌孫氏進士孟昌期之內子善爲詩一旦併焚其集  
以爲才思非婦人之事自是專以婦道內治孫有代夫  
贈人白蠟燭詩曰景勝銀缸香比蘭一條白玉逼人寒  
他時紫禁春風夜醉草天書仔細看又有聞琴詩曰玉

指朱絃軋復清湘妃愁怨最難聽初疑颯颯涼風動又  
似蕭蕭暮雨零近若流泉來碧嶂遠如玄鶴下青冥夜  
深彈罷堪惆悵霧濕叢蘭月滿庭又謝人送酒詩曰詩  
將清酒寄愁人澄徹甘香氣味真好是綠窻風月夜一

孟搖蕩滿懷春

出北夢  
瑣言

太平廣記卷二百七十一

欽定四庫全書

太平廣記卷二百七十二

婦人三

美婦人

夷光

麗娟

趙飛鸞

薛靈芸

孫亮姬朝姝

蜀甘后

石崇婢翹風

浙東舞女

妬婦

車武子妻

段氏

王道妻

杜蘭香

任環妻

楊宏武妻

房孺復妻

李廷璧妻

張楊妻

吳宗文

蜀功臣

秦騎將

美婦人

夷光

越謀滅吳畜天下奇寶美人異味以進於吳得陰峰之瑤  
古皇之驥湘沅之鰓又有美女一名夷光一名修明以貢於

吳吳處於椒花之房貫細珠以為簾幌朝下以蔽景夕卷  
以待月二人當軒並坐理鏡靚粧於珠幌之內竊窺者莫  
不動心驚魂謂之神人吳王夫差目之若雙鸞之在輕霧  
泚水之漾秋蕖妖惑既深怠於國政及越兵入國乃抱二  
人以逃吳苑越軍既入見二人在竹樹下皆言神女望而  
不侵今吳城蛇門內有折株尚為祠神女之處

出王子年  
拾遺記

### 麗娟

漢武帝所幸宮人名曰麗娟年始十四玉膚柔軟吹氣如蘭

身輕弱不欲衣纓拂恐傷為痕每歌李延年和之於闕芝生殿  
旁唱迴風之曲庭中樹為之翻落常致娟於琉璃帳恐垢污  
體也常以衣帶繫娟袂閉於重幕中恐隨風起娟以琥珀為  
佩置衣裾裏不使人知乃言骨節自鳴相與為神怪也

出洞冥記

趙飛鸞

漢趙飛鸞體輕腰弱善行步進退女弟昭儀不能及也但弱骨  
豐肌工笑語二人並色如紅玉當時第一擅殊寵後宮

出西京雜記

薛靈芸

魏文帝所愛美人薛靈芸常山人也父名鄴爲鄴鄉亭長母陳氏隨鄴舍於亭傍居生窮賤至夜每聚鄰婦以績燃麻藁自照靈芸年十五容貌絕世閭中少年多以夜時來窺終不得見咸熙元年谷習出守常山郡聞亭長有美女而家甚貧時文帝選良家子女以入六宮習以千金寶賂聘之既得便以獻文帝靈芸聞別父母歔歔累日淚下霑衣至升車就路之時以玉唾壺盛淚壺中即如紅色既發常山及至京師壺中淚凝如血帝遣車

十乘以迎靈芸車皆鏤金爲輪丹畫其轂軛前有雜寶爲龍鳳銜百子鈴鏘和鳴響於林野駕青色駢蹄之牛日行三百里此牛尸塗國所獻足如馬蹄也道側燒石葉之香此石重叠狀如雲母其氣辟惡厲之疾腹題國所獻也靈芸未至京師數十里膏燭之光相續不滅車從噓路塵起蔽於星月時人謂爲塵霄又築土爲臺基高三十丈列燭於臺下而名曰燭臺遠望如列星之墜地又於大道之傍一里致一銅表高五尺以誌里數故



行者歌曰青槐夾道多塵埃龍樓鳳閣望崔嵬清風細

雨雜香來土上出金火照臺

此上七字是妖辭也

時爲銅柱以誌

里數於道側是土上出金之義以燭致臺下則火在土下之義漢火德王魏土德王火伏而土興也土上出金魏滅而晉興也靈芸未至京師十里帝乘雕王之輦以望車徒之盛歎曰昔者言朝爲行雲暮爲行雨今非雲非雨非朝非暮因改靈芸之名爲夜來入宮承寵愛外國獻火珠龍鸞之釵帝曰明珠翡翠尚不勝況乎龍鸞

之重乃止而不進夜來妙於女功雖處於深帷重幄之內不用燈燭裁製立成非夜來所縫製帝不服也宮中

號曰針神

出王子年拾遺記

孫亮姬朝姝

孫亮作綠琉璃屏風甚薄而瑩澈每於月下清夜舒之嘗愛寵四姬皆振古絕色一名朝姝二名麗居三名洛珍四名潔華使四人坐屏風內而外望之如無隔唯香氣不通於外爲四人合四氣香此香殊方異國所獻凡

經歲踐躡宴息之處香氣沾衣歷年彌盛百浣不歇因  
名百濯香或以人名香故有朝姝麗居洛珍潔華香亮  
每遊此四人皆同與席使來侍皆以香名前後爲次不  
得相亂所居室爲思香媚寢

出王子年  
拾遺記

### 蜀甘后

蜀先主甘后沛人生於賤微里中相者云此女後貴位  
極宮掖及后生而體貌特異年至十八玉質柔肌態媚  
容冶先主致后於白綃帳中於戶外望者如月下聚雪

河南獻玉人高三尺乃取玉人致后側書則講說軍謀  
夕則擁后而玩玉人常稱玉之所貴比德君子況爲人  
形而可不玩乎甘后與玉人潔白齊潤觀者殆相亂惑  
嬖寵者非唯嫉甘后而亦妬玉人后常欲琢毀壞之乃  
戒先主曰昔子罕不以玉爲寶春秋美之今吳魏未滅  
安以妖玩經懷凡淫惑生疑勿復進焉先主乃撤玉人  
像嬖者皆退當時君子以甘后爲神智婦人

出王子年  
拾遺記

石崇婢翹風

石季倫所愛婢名翾風魏末於胡中買得之年始十歲使房內養之至年十五無有比其容貌特以姿態見美妙別玉聲能觀金色石氏之富財比王家驕侈當世珍寶瑰奇視如瓦礫聚如糞土皆殊方異國所得莫有辨識其處者使翾風別其聲色並知其所出之地言西方北方玉聲沈重而性溫潤佩服益人性靈東方南方玉聲清潔而性清涼佩服者利人精神石氏待人美艷者數千人翾風最以文辭擅愛石崇常語之曰吾百年之

後當指白日以汝爲殉答曰生愛死離不如無愛妾得爲殉身其何朽於是彌見寵愛崇常擇美容姿相類者數十人裝飾衣服大小一等使忽視不分別常侍于側使颿風調玉以付工人爲倒龍之珮紫金爲鳳冠之釵刻玉爲倒龍之勢鑄金像鳳凰之形結袖繞楹而舞晝夜相接謂之常舞若有所召者不呼姓名悉聽珮聲視釵色玉聲輕者居前金色艷者居後以爲行次而進也使數十人各含異香使行而笑語則口氣從風而颿

又屑沈水之香如塵末布致象牀上使所愛踐之無跡  
即賜珍珠百琲若有跡者則節其飲食令體輕弱故閨  
中相戲曰爾非細骨輕軀那得百琲真珠及翾風年至  
三十妙年者爭嫉之或言胡女不可爲羣競相排毀崇  
受譖潤之言即退翾風爲房老使主羣少乃懷怨懟而  
作五言詩詩曰春華誰不羨卒傷秋落時哽咽追自泣  
鄙退豈所期桂芬徒自蠹失愛在蛾眉坐見芳時歇憔悴  
空自嗤石氏房中並歌此爲樂曲至晉末乃止

出王子年

拾遺記

湘東舞女

寶曆二年浙東貢舞女二人一曰飛鸞一曰輕鳳修眉  
點首蘭氣融冶冬不續衣夏無汗體所食多荔枝榘實  
金屑龍腦之類戴輕金之冠衣紺羅之衣無縫而成其文纖  
巧人未能識輕金冠以金絲結之爲鸞鶴之狀仍飾以  
五彩細珠玲瓏相續可高一尺秤之無三二錢上更琢  
玉芙蓉以爲頂二女歌舞臺每夜歌舞一發如鸞鳳之



音百鳥莫不翔集其上及於庭際舞態艷逸非人間所  
有每歌罷上令內人藏之金屋寶帳蓋恐風日所侵故  
也由是宮中語曰寶帳香重重一雙紅芙蓉

出杜陽  
雜編

妬婦

車武子妻

俗說車武子妻大妬呼其婦兄宿取一絳裙衣挂屏風  
上其婦拔刀徑上牀發被乃其兄也慙而退

出要  
錄

段氏

臨濟有妬婦津傳言晉太始中劉伯玉妻段氏字明光性妬忌伯玉嘗於妻前誦洛神賦語其妻曰取婦得如此吾無憾焉明光曰君何得以水神美而欲輕我吾死何患不爲水神其夜乃自沈而死死後七日夢見語伯玉曰君本願神吾今得爲神矣伯玉遂終身不復渡水有婦人渡此津者皆壞衣枉粧然後敢濟不爾風波暴發醜婦雖盛粧飾而渡其神亦不妬也婦人渡河無風浪者以爲醜不能致水神醜婦諱之莫不皆自毀形容以塞嗤笑也故齊人語

曰欲求好婦立在津口婦人水旁好醜自彰

出酉陽雜俎

### 王導妻

王導妻曹氏甚妬忌制丞相不得有侍御乃至左右小人有妍少者必加誚責乃密營別館衆妾羅列有數男曹氏知大驚恚乃將黃門及婢二十人入持食刀欲出討尋王公遽命駕患遲乃親以麈尾柄助御者打牛狼狽奔馳乃得先去司徒蔡謨聞乃詣王謂曰朝廷欲加公九錫知否王自叙謀志蔡曰不聞餘物惟聞短轅犢

車長柄塵尾耳導大慙

出妬記

杜蘭香

杜蘭香降張碩碩妻無子取妾妻妬無已碩謂香如此云何香曰此易治耳言卒而碩妻患創委頓碩曰妻將死如何香曰此創所以治妬創已亦當瘥數日之間創損而妻無妬心遂生數男

出杜蘭香別傳

任環妻

唐初兵部尚書任環敕賜宮女二人皆國色妻妬爛二

女頭髮禿盡太宗聞之令上宮齎金胡餅酒賜之云飲之立死環三品合置姬媵爾後不妬不須飲之若妬即飲柳氏拜敕訖曰妾與環結髮夫妻俱出微賤更相輔翼遂致榮官環今多內嬖誠不如死遂飲盡然非酖也既睡醒帝謂環曰其性如此朕亦當畏之因詔二女令

別宅安置

出朝野僉載

又房玄齡夫人至妬太宗將賜美人屢辭不受乃令皇后召夫人語以媵妾之流令有常制且司空年近遲暮

帝欲有優崇之意夫人執心不迴帝乃令謂曰寧不妬而生寧妬而死曰妾寧妬而死乃遣酌一卮酒與之曰若然可飲此一酖一舉便盡無所留難帝曰我尚畏見何況於玄齡乎

出國史  
異纂

楊宏武妻

楊宏武爲司戎少常伯高宗謂之曰某人何因輒授此職對曰臣妻韋氏性剛悍昨以此見屬臣若不從恐有後患帝嘉不隱笑而遣之

出國史  
異纂

房孺復妻

房孺復妻崔氏性妬忌左右婢不得濃粧高髻見給臙脂一豆粉一錢有一婢新買粧稍佳崔怒謂曰汝好粧耶吾爲汝粧乃令刻其眉以青填之燒鑊桁灼其兩眼角皮隨焦卷以朱傅之及痂落癩如粧焉

出酉陽雜俎

李廷璧妻

李廷璧二十年應舉方於蜀中策名歌篇靡麗詩韻精能嘗爲舒州軍倅其妻猜妬一日鈴閣連宴三宵不歸

妻達意云來必刃之泣告州牧徙居佛寺決辰晦迹因  
詠愁詩曰到來難遣去難留着骨黏心萬事休潘岳愁  
絲生鬢裏婕妤悲色上眉頭長途詩盡空騎馬遠雁聲  
初獨倚樓更有相思不相見酒醒燈背月如鉤

出村  
情集

張楊妻

張楊尚書典晉州外貯所愛營妓生一子其內蘇氏妬  
忌不敢取歸乃與所善張處士爲子居江津間常致書  
題問其存亡資以錢帛及漸成長教其讀書有人告以



非處士之子爾父在朝官高因竊其父與張處士緘札  
不告而遁歸京國楊已死至宅門僮僕無有識者但云  
江淮郎君兄弟皆愕然其嫡母蘇夫人泣而謂諸子曰  
誠有此子吾知之矣我少年無端致其父子死生永隔  
我罪多矣家眷衆泣取入宅齒諸兄之列名仁龜有文學  
修詞應進士舉及第歷侍御史因奉使江浙而死

出北  
夢瑤

言

吳宗文

王蜀吳宗文以功勲繼領名郡少年富貴其家姬僕樂妓十餘輩皆其精選也其妻妬每怏怏不愜其志忽一日鼓動趨朝已行數坊忽報云放朝遂密戒從者潛入遍幸之至十數輩遂據腹而卒

出王氏見間

### 蜀功臣

蜀有功臣忘其名其妻妬忌家畜妓樂甚多居常即隔絕之或宴飲即使隔簾幙奏樂某未嘗見也其妻左右常令老醜者侍之某嘗獨處更無侍者而居第器服甚

盛後妻病甚語其夫曰我死若近婢妾立當取之及屬  
續某乃召諸姬日夜酣飲爲樂有掌衣婢尤屬意即幸  
之方寢息忽有聲如霹靂帷帳皆裂某因驚成疾而死

出王氏  
見聞

### 秦騎將

秦騎將石某者甚有戰功其妻悍且妬石常患之後其  
妻獨處乃夜遣人刺之妻手接其刃號救叫喊婢妾共  
擊賊遂折鐔而去竟不能害婦十指皆傷後數年秦亡

入蜀蜀遣石將兵屯于褒梁復於軍中募俠士就家刺之褒蜀相去數千里俠士於是挾刃懷家書至其門曰褒中信至今面見夫人夫人喜出見俠拜而授其書捧接之際揮刃斫之妻有一女躍出舉手接刃相持久之竟不能害外人聞而救之女十指並傷後十年蜀亡歸秦邦竟與其夫偕老死於牖下

出玉堂  
閒話

太平廣記卷二百七十二

欽定四庫全書

太平廣記卷二百七十三

婦人四

周皓

李秀蘭

杜牧

劉禹錫

李逢吉

洛中舉人

蔡京

武昌妓

韋保衡

曹生

羅虬

徐月英

周皓

太僕卿周皓貴族子多力負氣天寶中皓少年常結客  
爲花柳之遊竟畜亡命訪城中名姬如蠅襲羶無不獲  
者時靖恭有姬名夜來稚齒巧笑歌舞絕倫貴公子破  
產迎之皓時與數輩富者更擅之會一日其母白皓曰  
某日夜來生日豈可寂寞乎皓與往還竟求珍貨合錢  
數十萬會飲其家樂工賀懷智紀孩孩皆一時絕手扁  
方合忽覺擊門聲甚急皓戒內勿開良久折闥而入有  
少年紫衣騎從數十詰其母即將軍高力士之子也母

與夜來泣拜諸客將散皓時血氣方剛且恃其力顧從者不相敵因前讓其怙勢攘臂格之紫衣者踣於拳下且絕其頷骨大傷流血皓遂突出時都亭驛所由魏貞有心義好養私客皓以情投之貞乃藏於妻女間時有司追捉急切貞恐蹤露乃夜辦裝具腰白金數錠謂皓曰汴州周簡老義士也復與郎君當家今可依之且宜謙恭不怠周簡老蓋大俠也見魏貞書喜甚皓因拜之爲叔遂言其狀簡老令居一船中戒無妄出供與極厚

居歲餘忽聽船上哭泣聲皓潛窺之見一少婦縞衣甚  
美與簡老相慰其夕簡老忽至皓處問君婚未某有表  
妹嫁與甲甲卒無子今無所歸可事君子皓拜謝之即  
夕其表妹歸皓有女二人男一人猶在舟中簡老忽語  
皓事已息君貌寢必無人識者可遊江淮乃贈百餘千  
號哭而別於是遂免

出西陽  
雜俎

李秀蘭

李秀蘭以女子有才名初五六歲時其父抱於庭作詩



詠薔薇其末句云經時未架却心緒亂縱橫父恚曰此女子將來富有文章然必爲失行婦人矣竟如其言

出玉

堂閒話

又秀蘭嘗與諸賢會烏程縣開元寺知河間劉長卿有陰疾謂之曰山氣日夕佳長卿對曰衆鳥欣有託舉坐大笑論者兩美之秀蘭有詩曰遠水浮仙棹寒星伴使車蓋五言之佳境也上方班姬即不足下比韓英則有餘亦女中之詩豪也嘗賦得三峽流泉歌曰妾家本住

巫山雲巫山流水常自聞玉琴彈出轉寥夔直似當時  
夢中聽三峽迢迢幾千里一時流入深閨裏巨石奔湍  
指下生飛波走浪絃中起初疑噴湧含雷風又似鳴咽  
流不通迴湍瀨曲勢將盡時復滴瀝平沙中憶昔阮公  
爲此曲能使仲容聽不足一彈既罷又一彈願與流泉

鎮相續

出中興  
間氣集

杜牧

唐中書舍人杜牧少有逸才下筆成詠弱冠擢進士第

復捷制科牧少雋性疎野放蕩雖爲檢制而不能自禁  
會丞相牛僧孺出鎮揚州辟節度掌書記牧供職之外  
唯以宴遊爲事揚州勝地也每重城向夕倡樓之上常  
有絳紗燈萬數輝羅耀列空中九里三十步街中珠翠  
填咽邈若仙境牧常出沒馳逐其間無虛夕復有卒三  
十人易服隨後潛護之僧孺之密教也而牧自謂得計  
人不知之所至成歡無不會意如是且數年及徵拜侍  
御史僧孺於中堂餞因戒之曰以侍御史氣槩遠馭固

當自極夷塗然常慮風情不節或至尊體乖和牧因謬  
曰某幸常自檢守不至貽尊憂耳僧孺笑而不答即命  
侍兒取一小書簾對牧發之乃街卒之密報也凡數十  
百悉曰某夕杜書記過某家無恙某夕宴某家亦如之  
牧對之大慙因泣拜致謝而終身感焉故僧孺之薨牧  
爲之誌而極言其美報所知也牧既爲御史以之分務  
洛陽時李司徒愿罷鎮閒居聲妓豪華爲當時第一洛  
中名士咸謁見之李乃大開宴席當時朝客高流無不

臻赴以牧持憲不敢邀至牧遣座客達意願預期會李  
不得已馳書方對酒獨斟亦已酣暢間命遽來時會中  
已飲酒女妓百餘人皆絕藝殊色牧獨坐南行瞪目注  
視引滿三卮問李云間有紫雲者孰是李指示之牧復  
凝睇良久曰名不虛得宜以見惠李俯而笑諸妓皆亦  
迴首破顏牧又自飲三爵朗吟而起曰華堂今日綺筵  
開誰喚分司御史來忽發狂言驚滿座兩行紅粉一時  
迴意氣閒逸旁若無人牧又自以年漸遲暮常追賦感

舊詩曰落魄江湖載酒行楚腰纖細掌中情十年一覺  
揚州夢贏得青樓薄倖名又曰觥船一棹百分空十載  
青春不負公今日髻絲禪榻畔茶烟輕颺落花風太和  
末牧復自侍御史出佐沈傳師江西宣州幕雖所至輒  
遊而終無屬意咸以非其所好也及聞湖州名郡風物  
妍好且多奇色因甘心遊之湖州刺史某乙牧素所厚  
者頗喻其意及牧至每爲之曲宴周遊凡優姬倡女力  
所能致者悉爲出之牧注目凝視曰美矣未盡善也乙

復候其意牧曰願得張水嬉使州人畢觀候四面雲合  
某當閒行寓目冀於此際或有閱焉乙大喜如其言至  
日兩岸觀者如堵迨暮竟無所得將罷舟艤岸於叢人  
中有里姥引鵝頭女年十餘歲牧熟視曰此真國色向  
誠虛設耳因使語其母將接致舟中姥女皆懼牧曰且  
不即納當爲後期姥曰他年失信復當何如牧曰吾不  
十年必守此郡十年不來乃從爾所適可也母許諾因  
以重幣結之爲盟而別故牧歸朝頗以湖州爲念然以

官秩尚卑殊未敢發尋拜黃州池州又移睦州皆非意也牧素與周墀善會墀爲相乃併以三牋干墀乞守湖州意以弟頭目疾冀於江外療之大中三年始授湖州刺史比至郡則已十四年矣所約者已從人三載而生三子牧既即政函使召之其母懼其見奪携幼以同往牧詰其母曰曩既許我矣何爲反之母曰向約十年十年不來而後嫁嫁已三年矣牧因取其載詞視之俛首移晷曰其詞也直彊之不祥乃厚爲禮而遣之因賦詩



以自傷曰自是尋春去校遲不須惆悵怨芳時狂風落  
盡深紅色綠葉成陰子滿枝

出唐  
闕史

### 劉禹錫

劉禹錫赴任姑蘇道過揚州州帥杜鴻漸飲之酒大醉  
而歸驛稍醒見二女子在旁驚非已有也乃曰郎中席  
上與司空詩特令二樂妓侍寢且醉中之作都不記憶  
明旦修啓致謝杜亦優容之夫禹錫以郎吏州牧而輕  
忤三司豈不過哉詩曰高髻雲鬟宮樣粧春風一曲杜

韋娘司空見慣尋常事斷盡蘇州刺史腸

出雲谿  
友議

李逢吉

李丞相逢吉性彊愎而沉猜多忌好危人略無忤色既爲居守劉禹錫有妓甚麗爲衆所知李恃風望恣行威福分務朝官取容不暇一旦陰以計奪之約曰某日皇城中堂前致宴應朝賢寵嬖並請早赴境會稍可觀矚者如期雲集敕閤吏先放劉家妓從門入傾都驚異無敢言者劉計無所出惶惑吞聲又翌日與相善數人謁

之但相見如常從容久之並不言境會之所以然者座  
中默然相目而已既罷一揖而退劉歎咤而歸無可奈  
何遂憤懣而作四章以擬四愁云爾玉釵重合兩無緣  
魚在深潭鶴在天得意紫鸞休舞鏡寄言青鳥罷銜戩  
金盆已覆難收水玉軫長拋不續絃若向蘼蕪山下過  
遙將紅淚灑窮泉鸞飛遠樹栖何處鳳得新巢已去心  
紅壁尚留香漠漠碧雲初散信沈沈情知點污投泥玉  
猶自經營買笑金從此山頭似人石丈夫形狀淚痕深

人曾何處更尋看，雖是生離死一般。  
買笑樹邊花已老，畫眉牕下月猶殘。  
雲藏巫峽音容斷，路隔星橋過往難。  
莫怪詩成無淚滴，盡傾東海也須乾。  
三山不見海沈沈，豈有仙蹤更可尋。  
青鳥去時雲路斷，姮娥歸處月宮深。  
紗窗遙想春相憶，書幌誰憐夜獨吟。  
料得夜來天上鏡，只因偏照兩人心。

見本事詩

洛中舉人

舉子某乙洛中居人也，偶與樂妓茂英者相識，英年甚

小及乙到江外偶於飲席遇之因贈詩曰憶昔當初過  
柳樓茂英年小尚嬌羞隔牕未省聞高語對鏡曾窺學  
上頭一別中原俱老大重來南國見風流彈絃酌酒話  
前事零落碧雲生暮愁舉子因謁節使遂客遊留連數  
月帥遇之甚厚宴飲既頻與酒糺諧戲頗洽一日告辭  
帥厚以金帛贐行復開筵送別因暗留絕句與糺曰少  
插花枝少下籌須防女伴妬風流坐中若打占相令除  
却尚書莫點頭因設舞曲遺詩帥取覽之當時即令人

所在送付舉子

出盧氏雜說

蔡京

邕南節度使蔡京過永州永州刺史鄭史與京同年連以酒樂相邀座有瓊枝者鄭之所愛而席之最妍蔡彊奪之行鄭莫之競也邕南之所爲多如此類爲德義者見鄙終其不悛也及邕南制禦失律伏法

出雲谿友議

武昌妓

韋蟾廉問鄂州及罷任賓僚盛陳祖席蟾遂書文選句

云悲莫悲兮生別離登山臨水送將歸以牋毫投賓從  
請續其句座中悵望皆思不屬逡巡女妓泣然起曰某  
不才不敢染翰欲口占兩句韋大驚異令隨口寫之武  
昌無限新栽柳不見楊花撲面飛座客無不嘉歎韋令  
唱作楊柳枝詞極歡而散贈數十箋納之翌日共載而

發

出杼  
情詩

### 韋保衡

韋保衡嘗訪同人方坐李鉅新及第亦繼至保衡以其

後先匿於帷下既入曰有客乎同人曰韋保衡秀才可  
以出否鉅新及第甚自得意徐曰出也何妨保衡竟不  
之出洎保衡尚公主為相李蟪鎮岐下鉅方自山北舊從  
事辟焉初保衡既登第獨孤雲除東川辟在幕下樂籍  
間有佐飲者副使李甲屬意也時以逼於他適私期迴  
將納焉保衡既至不知之祈於獨孤且請降其籍李至  
意殊不平每在宴席輒以語侵保衡保衡不能容即携  
其妓人以去李益怒之屢言於雲雲不得已命飛牒追



之而迴無何堂牒追保衡赴輦下乃尚同昌公主也李  
固懼之矣不日保衡復入翰林李聞之登時而卒

出王  
泉子

### 曹生

盧常侍鉅牧瀘江日相座囑一曹生令署郡職不免奉  
之曹悅營妓名丹霞盧沮而不許會餞朝客於短亭曹  
獻詩曰拜玉亭間送客忙此時孤恨感離鄉尋思往歲  
絕纓事肯向朱門泣夜長盧演爲長句和而勉之曰桑  
扈交飛百舌忙祖亭間樂倍思鄉樽前有恨慙卑宦席

上無寥愛艷粧莫爲狂花迷眼界須求真理定心王遊  
蜂採掇何時已祇恐多言議短長

出盧懷  
杓情集

羅虬

羅虬詞藻富贍與宗人隱鄴齊名咸通乾符中時號三  
羅廣明庚子亂後去從鄜州李孝恭籍中有紅兒者善  
爲音聲常爲副戎屬意會副戎聘鄰道虬請紅兒歌而  
贈之繒綵孝恭以副車所盼不令受之虬怒拂衣而起  
詰旦手刃紅兒既而思之乃作絕句百編號比紅兒詩

大行於時

出撫言

徐月英

江淮間有徐月英者名娼也其送人詩云惆悵人間萬  
事違兩人同去一人歸生憎平望亭中水忍照鴛鴦相  
背飛又云枕前淚與階前雨隔箇牕兒滴到明亦有詩  
集金陵徐氏諸公子寵一營妓卒乃焚之月英送葬謂  
公子曰此娘平生風流沒亦帶焰時號美戲也

出北夢  
瑣言

太平廣記卷二百七十三

欽定四庫全書

太平廣記卷二百七十四

情感

買粉兒

崔護

武延嗣

開元製衣女

韋臯

歐陽詹

薛宜僚

戎昱

買粉兒

有人家甚富止有一男寵恣過常遊市見一女子美麗

賣胡粉愛之無由自達乃託買粉日往市得粉便去初無所言積漸久女深疑之明日復來問曰君買此粉將欲何施答曰意相愛樂不敢自達然恒欲相見故假此以觀姿耳女悵然有感遂相許以私尅以明夕其夜安寢堂屋以俟女來薄暮果到男不勝其悅把臂曰宿願始伸於此歡踴遂死女惶懼不知所因遯去明還粉店至食時父母怪男不起往視已死矣當就殯斂發篋笥中見百餘裹胡粉大小堆積其母曰殺我兒者必此

粉也入市遍買胡粉次此女比之手跡如先遂執問女  
曰何殺我兒女聞嗚咽具以實陳父母不信遂以訴官  
女曰妾豈復慘死乞一臨尸盡哀縣令許焉徑往撫之  
慟哭曰不幸致此若死魂而靈復何恨哉男豁然更生  
具說情狀遂爲夫婦子孫繁茂

出幽  
明錄

### 崔護

博陵崔護姿質甚美而孤潔寡合舉進士第清明日獨  
遊都城南得居人莊一畝之宮花木叢萃寂若無人扣

門久之有女子自門隙窺之問曰誰耶護以姓字對曰  
尋春獨行酒渴求飲女入以盃水至開門設牀命坐獨  
倚小桃斜柯佇立而意屬殊厚妖姿媚態綽有餘妍崔  
以言挑之不對彼此目注者久之崔辭去送至門如不  
勝情而入崔亦睠盼而歸爾後絕不復至及來歲清明  
日忽思之情不可抑徑往尋之門院如故而已扁鎖之  
崔因題詩於左扉曰去年今日此門中人面桃花相映  
紅人面不知何處去桃花依舊笑春風後數日偶至都



城南復往尋之聞其中有哭聲扣門問之有老父出曰  
君非崔護耶曰是也又哭曰君殺吾女崔驚怛莫知所  
答父曰吾女笄年知書未適人自去年已來常恍惚若  
有所失比日與之出及歸見在左扉有字讀之入門而  
病遂絕食數日而死吾老矣惟此一女所以不嫁者將  
求君子以託吾身今不幸而殞得非君殺之耶又持崔  
大哭崔亦感慟請入哭之尚儼然在牀崔舉其首枕其  
股哭而祝曰某在斯須臾開目半日復活老父大喜遂

以女歸之

出本事詩

武延嗣

唐武后載初中左司郎中喬知之有婢名窈娘藝色爲當時第一知之寵待爲之不婚武延嗣聞之求一見勢不可抑既見即留無復還理知之痛憤成疾因爲詩寫以縑素厚賂閹守以達窈娘窈娘得詩悲咽結三章於裙帶赴井而死延嗣見詩遣酷吏誣陷知之破其家知之詩曰石家金谷重新聲明珠十斛買娉婷昔日可憐

君自許此時歌舞得人情君家樓閣不曾難好將歌舞  
借人看富貴雄豪非分理驕奢勢力橫相干別君去君  
終不忍徒勞掩袂傷鉛粉百年離別在高樓一代紅顏

爲君盡

出本  
事詩

### 開元製衣女

開元中頒邊軍續衣製於宮中有兵士於短袍中得詩  
曰沙場征戍客寒苦若爲眠戰袍經手作知落阿誰邊  
蓄意多添線含情更著綿今生已過也結取後身緣兵

士以詩白於帥帥進之玄宗命以詩遍示六宮曰有作者勿隱吾不罪汝有一宮人自言萬死玄宗深憫之遂以嫁得詩人仍謂之曰我與汝結今身緣邊人皆感泣

出本事詩

韋臯

唐西川節度使韋臯少遊江夏止於姜使君之館姜氏孺子曰荆寶已習二經雖兄呼於臯而恭事之禮如父也荆寶有小青衣曰玉簫年纔十歲常令祇侍臯兄王

簫亦懇於應奉後二載姜使入關求官家累不能行韋乃  
易居止頭陀寺荆寶亦時遣玉簫往彼應奉玉簫年稍  
長大因而有情時廉使陳常侍得韋季父書云姪臯久  
客貴州切望發遣歸覲廉使啟緘遺以舟楫服用仍恐  
淹留請不相見泊舟江瀨俾篙工促行韋昏瞑拭淚乃  
裁書以別荆寶寶頃刻與玉簫俱來既悲且喜寶命青  
衣往從侍之韋以違覲日久不敢俱行乃固辭之遂與  
言約少則五載多則七年取玉簫因留玉指環一枚并

詩一首遺之既五年不至玉簫乃靜禱於鸚鵡洲又逾  
二年至八年春玉簫歎曰韋家郎君一別七年是不來  
矣遂絕食而殞姜氏憫其節操以玉環著於中指而同  
殯焉後韋鎮蜀到府三日詢鞫獄囚滌其寃濫輕重之  
繫近三百餘人其中一輩五器所拘偷視廳事私語云  
僕射是當時韋兄也乃厲聲曰僕射僕射憶姜家荆寶  
否韋曰深憶之姜曰即某是也公曰犯何罪而重繫答曰  
某辭違之後尋以明經及第再選青城縣令家人誤熱解

舍庫牌印等韋曰家人之犯固非已尤即與雪冤仍歸  
墨綬乃奏眉州牧敕下未令赴任遣人監守朱紱其縈  
且留賓幕時屬大軍之後草創事繁凡經數月方問王  
簫何在姜曰僕射維舟之夕與伊留約七載是期既逾  
時不至乃絕食而終因吟留贈玉環詩云黃雀銜來已  
數春別時留解贈佳人長江不見魚書至爲遣相思夢  
入秦韋聞之益增悽歎廣修經像以報夙心且想念之  
懷無由再會時有祖山人者有少翁之術能令逝者相

親但令府公齋戒七日清夜玉簫乃至謝曰承僕射寫  
經造像之力旬日便當托生却後十三年再爲侍妾以  
謝鴻恩臨去微笑曰丈夫薄情令人死生隔矣後韋以  
隴右之功終德宗之代理蜀不替是故年深累遷中書  
令天下響附瀘熒歸心因作生日節鎮所賀皆貢珍奇  
獨東川盧八座送一歌姬未當破瓜之年亦以玉簫爲  
號觀之乃真姜氏之玉簫也而中指有肉環隱出不異  
留別之玉環也韋歎曰吾乃知存歿之分一往一來玉



簫之言斯可驗矣

出雲谿  
友議

歐陽詹

歐陽詹字行周泉州晉江人弱冠能屬文天縱浩汗貞  
元年登進士第畢關試薄遊太原於樂籍中因有所悅  
情甚相得及歸乃與之盟曰至都當相迎耳即灑泣而  
別仍贈之詩曰驅馬漸覺遠迴頭長路塵高城已不見  
况復城中人去意既未甘居情諒多辛五原東北晉千  
里西南秦一屨不出門一車無停輪流萍與繫瓠早晚

期相親尋除國子四門助教住京籍中者思之不已經  
年得疾且甚乃危粧引髻刃而匣之顧謂女弟曰吾其  
死矣苟歐陽生使至可以是以爲信又遺之詩曰自從別  
後減容光半是思郎半恨郎欲識舊時雲髻樣爲奴開  
取縷金箱絕筆而逝及詹使至女弟如言徑持歸京具  
白其事詹啓函閱之又見其詩一慟而卒故孟簡賦詩  
序曰閩越之英惟歐陽生詩哭之以能文擢第爰始一  
命食太學之祿助成均之教有庸績矣我唐貞元年已

卯歲曾獻書相府論大事風韻清雅詞旨切直會東方  
軍興府縣未暇慰薦久之倦遊太原還來帝京卒官靈  
臺悲夫生於單貧以狗名故心專勤儉不識聲色及茲  
筮仕未知洞房纖腰之爲蠱惑初抵太原居大將軍宴  
席上有妓北方之尤者屢目於生生感悅之留賞累月  
以爲燕婉之樂盡在是矣既而南轅妓請同行生曰十  
目所視不可不畏辭焉請待至都而來迎許之乃去生  
竟以蹇連不克如約過期命甲遣乘密往迎妓妓因積

望成疾不可爲也先死之夕剪其雲髻謂侍兒曰所歡  
應訪我當以髻爲貺甲至得之以乘空歸授髻於生生  
爲之慟怨涉旬而生亦歿則韓退之作何蕃書所謂歐  
陽詹生者也河南穆元道訪予常歎息其事嗚呼鍾愛  
於男女素其效死夫亦不蔽也大凡以斷割不爲麗色  
所汨豈若是乎古樂府詩有華山畿玉臺新詠有廬江  
小吏更相死或類於此暇日偶作詩以繼之云有客非  
北逐驅馬次太原太原有佳人神艷照行雲座上轉橫

波流光注夫君夫君意蕩漾即日相交歡定情非一詞  
結念誓青山生死不變易中誠無間言此爲太學徒彼  
屬北府官中夜欲相從嚴城限軍門白日欲同居君畏  
仁人聞忽如隴頭水坐作東西分驚離腸千結滴淚眼  
雙昏本達京師迴駕期相追攀宿約始乖阻彼憂已纏  
綿高髻若黃鸝危鬢如玉蟬纖手自整理剪刀斷其根  
柔情託侍兒爲我遺所歡所歡使者來侍兒因復前收  
淚取遺寄深誠祈爲傳封來贈君子願言慰窮泉使者

迴復命遲遲蓄悲酸詹生喜言旋倒屣走迎門長跪聽  
未畢驚傷涕漣漣不飲亦不食哀心百千端襟情一夕  
空清爽旦日殘哀哉浩然氣潰散歸化元短生雖別離  
長夜無阻難雙魂終會合兩劍遂蜿蜒丈夫早通脫巧  
笑安能干防身本苦節一去何由還後生莫沈迷沈迷

喪其真

出閩川  
名士傳

薛宜僚

薛宜僚會昌中爲左庶子充新羅冊贈使由青州泛海

船頻阻惡風雨至登舟却漂迴泊青州郵傳一年節使  
烏漢真尤加待遇籍中飲妓段東美者薛頗屬情連帥  
置於驛中是春薛發日祖筵嗚咽流涕東美亦然乃於  
席上留詩曰阿母桃花方似錦王孫草色正如烟不須  
更向滄溟望惆悵歡情恰一年薛到外國未行冊禮旌  
節曉夕有聲旋染疾謂判官苗甲曰東美何故頻見夢  
中乎數日而卒苗攝大使行禮薛旋櫬迴及青州東美  
乃請告至驛素服執奠哀號撫柩一慟而卒情緣相感

頗爲奇事

出行  
情集

戎昱


韓晉公滉鎮浙西戎昱爲部內刺史郡有酒妓善歌色  
亦閑妙昱情屬甚厚浙西樂將聞其能白滉召置籍中  
昱不敢留俄於湖上爲歌詞以贈之且曰至彼令歌必  
首唱是詞既至韓爲開筵自持盃令歌送之遂唱戎詞  
曲既終韓問曰戎使君於汝寄情耶妓悚然起立曰然  
淚下隨言韓令更衣待命席上爲之憂危韓召樂將責



曰戎使君名士留情郡妓何故不知而召置之成余之  
過乃十答之命妓與百縑即時歸之其詞曰好去春風  
湖上亭柳條藤蔓繫人情黃鶯久住渾相戀欲別頻啼

四五聲

出本  
事詩



太平廣記卷二百七十四